

INUIT ATAQATIGIIT

Inatsisartuni



UKA18/152
05.11.2018
Aqqaluaq B. Egede

Naalackersuisut kingusinnerpaamik UPA2019-imut Kalaallit Nunaanni pisortatigoortumik piitsuussutsimik killiliissummik aalajangersaanissaat pillugu Inatsisartut aalajangiiffigisassaattut siunnersuut.
(Inuit Ataqatigiit Inatsisartuni ilaasortaataat)

Nunatsinni inuit atugaasa nikinganerujussuat takussutissaavoq nunatsinni inuit atugaat pillugit naalackersuinikkut annertuunik suliassaqtartugut. Aamma uppersaatissaqtartipparput suliffippassuarnik pilersitsinerinnakkut aaqqiissut tamakkiisoq angusinnaanatu. Inoqatitta inuuniarnerat tamakkiisumik aaqqinniarutsigu inulerisut, tarnip pissusaanik ilisimasallit, peqqinnissaqarfik, inuussutissarsiortut, kommunit il.il. kattulluta suleqatigiinnerput nukittorsartariaqarparput.

Nunatsinni inuit piitsuullutik inuusut amerlaqaat. Nalunngilarput isertuussinnaanngilarpullu inuit nunaqavissut amerlasuut piitsuummata. Nunatta naalackersuinikkut nutarteriffiusariaqartup uppersaatissarpassui naatsorsueqqissaartarfiup kisitsisaataasigut takusinnaavagut. Inuit Ataqatigiit pingaaruteqartorujussuurtut isigaarput, suliassat pingaarutilippassuit Inatsisartut ataatsimiinneranni naammassisinnaanngisagut pillugit immikkut ittumik Inatsisartut ataatsimiinniarlik. Nunarput inuulu pillugit allanngortikkusutagut pillugit isumasioqatigiinniarta. Allannguissagutta tuaviusukaaginnaq sulinikkut allannguniarneq angujuminaappallaaqaaq. Inatsisartut ataatsimiinnerisa avataasigut immikkut ittumik Inatsisartut katersuutsinneqarniarlik, tamanna inuiaqatigiinnut akilersinnaanerpaajussaaq.

Nunatsinni piitsuussutsip killilernissaa siunertaralugu nalunaarsuutini pilersitsineq, nalunaarsorneqarsimasunillu takussutissaateqalernissaaq immi pitsaasuussaaq. Tamannali kinguneqartinneqanngippat siunertaq naammassineqassanngimmat naalackersuinikkut suleriaatsinik nutarterisoqartariaqartoq Inuit Ataqatigiit isumaqarpugut. Inuiaqatigiinni sulisartoqarnikkut aaqqissuussinermi nutaamik pisortani atorfinni isertitaqqortussutsimik nalunaarsuinerit aamma ilaatinneqartariaqarput.

Sulisartut aalajaassusaannik nalunaarsuinerit ilaatinneqartariaqarput. Atorfiit taarseraaffiusut aamma inuit atorfinitsinneqartartut taarseraaffiunerpaat ilanngullugit nakkutigineqalertariaqarput. Suliffiit pioreersut taakkuummata aamma suliffissaqartitsiniarnermi atorluarneqarsinnaasut. Uppersaatissaqtartipparpummi

nunatta avataaniit suliarortut amerlasuut sivikitsuinnarmi atorfeqartartuusut, tamakku ilanngullugit isummerfigineqartariaqarput.

Inuit Ataqatigiit siunnersuut una pingaarutilittut isigaarput. Inuppassuaqarmat aningaasaqarnikkut pissakittuunnaratik aamma piitsuusunik. Nunatsinni issittumi, illersoqatigiilluni inuuniarfigiuarsimasatsinni inoqaterpassuatta piitsuunerat akuerineqarsinnaangilaq. Iliuuseqassaguttali siullertut piitsuussutsip killilerneqarnissaa pisariaqartoq suliarineqartariaqarpoq. Kommuni tamani piitsuussutsip killilerneratigut inuiaqatigiinni piitsuussutsip qanoq agguataarsimanera paasisaqarfigissallugu pisariaqavippoq. Ilarpassuagut inoqarfinni inuuniarnermikkut atugaat qaninnerusumik nalilersorniartigit.

Inuit Ataqatigiinniit Naalakkersuisut allannguutissatut siunnersuutaat akerlilingilarput. Taamaattorli siunnersuutit ataatsimiititaliami suliarisassanngorlugu ingerlateqqinneqarnissaa siunnersuutigaarput. Naalakkersuisut aningaasaqarnikkut ingerlatsineq pillugu nalunaarutaani piitsuussutsip nalunaarusiorneqarnissaa immini naamangilaq. Pisariaqarpoq piitsuussutsip qanoq isertitalinnut killilerneqarnissaa qulakkiissallugu. Tamattami piitsuussutsit isertitaqqortussutsikkut qanoq killeqarnissaa assigiinngitsunik killeqartissinnaavagut.

Inuit Ataqatigiit isumaqarpugut pingaaruteqartoq piitsuussutsip killilerneqarnissaa pillugu aalajangersaanerit pisariaqartut. Piitsuussuseq isiginnaaginnarnagu, aamma nalunaarusiariinnarnagu iliuuseqarfigineqartariaqarmat. Sulili tupinnarneruvoq naalakkersuinikkut erseqqilluinnartunik piitsuussutsip akiorneqarnissaa suli timitalersuiffineqanngimmat. Imaangilarmi suliffissat pilersinneqarpata taava ajornartorsiut qaangissagipput. Paasereerparpummi sulisinnaangivissortumik nalilerneqarsimasut nunatsinni amerlasuujusut, aamma immikkut iliuuseqarfigisariaqartunut ilaasut.

Taamatut oqaaseqarluta Naalakkersuisut allannguutissatut siunnersuutaat akueraarput, kisianni aamma ammaffigalugu nunatsinni inuit piitsuussutsimut killilerneqarsimasumik nalunaarusiorfigineqartalernissaat anguneqassasoq. Allatut oqaatigalugu nalunaarusiariinnarnagit nunatsinni piitsuussutsip killilerneqarnissaa aamma inatsisitigut sinaakkuserneqarnissaa anguniarneqassasoq kissaatigaarput.

Taamatut oqaaseqarluta siunnersuut Inatsisartut Aningaasaqarnermut Ataatsimiititaliaani suliarineqartussanngorlugu ingerlatinneqassasoq inassutigaarput.